

## **PRAVILNIK O ŠAHOVSKIM SUDIJAMA**

### **OPŠTE ODREDBE**

#### **Član 1.**

Šahovske sudije Federacije Bosne i Hercegovine djeluju na organizovan način putem Sudijske komisije ŠSFBiH i kantonalnih sudijskih organizacija.

#### **Član 2.**

Šahovske sudije FBiH su obavezno i članovi ŠSFBiH.

#### **Član 3.**

Šahovske sudije FBiH dužne su se ponašati prema ovom Pravilniku i drugim normativnim aktima ŠSFBiH.

#### **Član 4.**

Šahovske sudije FBiH ostvaruju svoja prava u ŠSFBiH putem Sudijske komisije ŠSFBiH.

### **ORGANIZACIJA ŠAHOVSKIH SUDIJA**

#### **Član 5.**

Radom i organizacijom šahovskih sudija FBiH rukovodi Sudijska komisija ŠSFBiH i kantonalne sudijske organizacije.

#### **Član 6.**

Sudijska komisija ŠSFBiH djeluje na osnovu Statuta ŠSFBiH i ovog Pravilnika, a kantonalne sudijske organizacije na osnovu ovog Pravilnika, Statuta kantonalnih šahovskih saveza i svog Pravilnika.

#### **Član 7.**

Sudijska komisija ŠSFBiH ima svoj pečat okruglog oblika sa natpisom u prvom redu – Šahovski savez Federacije Bosne i Hercegovine - , a u drugom redu – Sudijska komisija -, a u sredini znak ŠSFBiH.

#### **Član 8.**

Sudijska komisija ŠSFBiH ima tri člana i tri zamjenika, koje imenuje Upravni odbor ŠSFBiH.

#### **Član 9.**

Mandat članova i predsjednika Sudijske komisije ŠSFBiH traje četiri godine. Mandat članova i predsjednika Sudijske komisije ŠSFBiH može prestati i prije ovog roka na lični zahtjev ili opozivom.

#### **Član 10.**

Zaključci i odluke Sudijske komisije ŠSFBiH su obavezujuće za sve kantonalne sudijske organizacije.

#### Član 11.

Zadaci Sudijske komisije ŠSFBiH su:

- Koordinacija i saradnja sa kantonalnim sudijskim organizacijama;
- Autentično tumačenje Pravila igre FIDE kao i Pravilnika i odredaba ŠSFBiH vezanih za svoj djelokrug rada;
- Organizovanje savjetovanja o aktuelnim pitanjima sudijske organizacije;
- Organizovanje seminara i ispita za Savezne i kantonalne sudije, te imenovanje članova Ispitnih komisija;
- Dodjeljivanje zvanja Saveznog sudije i predlaganje kandidata za FIDE sudije i međunarodne sudije FIDE;
- Određivanje sudija za Federalna i Državna takmičenja, kao i predlaganje za takmičenja FIDE;
- Donošenje Pravilnika o sudijskim taksama i drugim naknadama;
- Praćenje kvalitete suđenja svih aktivnih sudija;
- Vođenje disciplinskog postupka po prijavama i izricanje kazni sudijama za disciplinske prestupe u skladu sa aktima;
- Utvrđivanje visine godišnje članarine za sve nivoe sudija;
- Vođenje evidencije svih registrovanih Saveznih, FIDE sudija i međunarodnih sudija FIDE;
- Izdavanje odgovarajućih dokumenata sudijama

### ZVANJA ŠAHOVSKIH SUDIJA

#### Član 12.

Zvanja šahovskih sudija su:

- a) Klupski sudija
- b) Općinski sudija
- c) Kantonalni sudija
- d) Državni sudija
- e) FIDE sudija
- f) Međunarodni sudija FIDE

#### Član 13.

Zvanje šahovskog sudije stiču članovi ŠSFBiH sa navršenih 18 godina starosti i po ispunjavanju uslova predviđenih ovim Pravilnikom.

#### Član 14.

Zvanja šahovskih sudija su doživotna.

### STICANJE ZVANJA ŠAHOVSKOG SUDIJE

#### Član 15.

Od opštih uslova za sticanje zvanja klupskog, opštinskog i kantonalnog sudije kandidat mora ispunjavati sljedeće:

- Da ima preporuku svog kluba sa akcentom na moralne kvalitete;
- Da ima završenu najmanje srednju školu;
- Obavezno poznavanje rada na računaru

Od opštih uslova za sticanje zvanja državnog, FIDE sudije i međunarodnog sudije FIDE kandidat mora ispunjavati sljedeće:

- Da ima preporuku svog kantonalnog saveza sa akcentom na moralne kvalitete i poznavanje šahovske igre;
- Da ima završenu najmanje srednju školu;
- Da ima ovjerene turnirske tabele takmičenja na kojima je obavljao dužnosti sudije, od strane sudijske organizacije ŠSFBiH
- Obavezno poznavanje rada na računaru

#### Član 16.

Od posebnih uslova za sticanje zvanja opštinskog sudije kandidat mora ispunjavati sljedeće:

- Da ima zvanje klupskog sudije i staž u tom zvanju od jedne godine;
- Da je obavljao dužnost glavnog sudije ili njegovog zamjenika na najmanje četiri takmičenja;

Od posebnih uslova za sticanje zvanja kantonalnog sudije kandidat mora ispunjavati sljedeće:

- Da ima zvanje općinskog sudije i staž u tom zvanju od dvije godine;
- Da je obavljao dužnost glavnog sudije ili njegovog zamjenika na najmanje četiri zvanična općinska takmičenja od čega su dva u ekipnoj konkurenciji;

Od posebnih uslova za sticanje zvanja državnog sudije kandidat mora ispunjavati sljedeće:

- Da ima zvanje kantonalnog sudije i staž u tom zvanju od dvije godine;
- Da vlada jednim od zvaničnih jezika FIDE;
- Da je obavljao dužnost glavnog sudije ili njegovog zamjenika na najmanje pet zvaničnih kantonalnih ili saveznih takmičenja od kojih su tri u ekipnoj konkurenciji;

Od posebnih uslova za sticanje zvanja FIDE sudije kandidat mora ispunjavati sljedeće:

- Da ima zvanje državnog sudije i staž u tom zvanju od tri godine;
- Da aktivno govori jedan od zvaničnih jezika FIDE;
- Da ispunjava ostale uslove prema propisima FIDE;

Od posebnih uslova za sticanje zvanja međunarodnog sudije FIDE kandidat mora ispunjavati sljedeće:

- Da ima zvanje sudije FIDE i staž u tom zvanju od tri godine;
- Da aktivno govori jedan od zvaničnih jezika FIDE;
- Da ispunjava ostale uslove prema propisima FIDE;

#### Član 17.

Ispunjavanje uslova po pitanju obavljanja dužnosti na određenim takmičenjima će se smatrati i obavljanje dužnosti pomoćnog sudije na takmičenjima svih većih rangova od potrebnih iz prethodnog člana.

#### Član 18.

Plan i program seminara za sticanje zvanja kantonalnog sudije i nižeg ranga propisuje i prvo vodi kantonalna sudijska organizacija u skladu sa ovim Pravilnikom.

Plan i program seminara za sticanje zvanja državnog sudije propisuje i prvo vodi Sudijska komisija ŠSFBiH u skladu sa ovim Pravilnikom.

#### Član 19.

Predavači na seminarima i članovi ispitnih komisija su obavezno sudije državnog i višeg ranga. Ispitna komisija broji tri člana. Član Ispitne komisije može biti sudija najmanje istog ili višeg zvanja od ranga za koji se polaže ispit.

#### Član 20.

Seminar za sticanje zvanja klupskog i općinskog sudije organizuje se sa najmanje 25 nastavnih časova i obavezno obuhvata:

- Statut ŠSFBiH;
- Pravila šahovske igre FIDE;
- Pravilnik o šahovskim sudijama;
- Pravilnik o registraciji;
- Turnirske sisteme;
- Pripreme i organizaciju šahovskih takmičenja;
- Vrste šahovskih takmičenja;
- Osnovne pojmove međunarodnog vrednovanja rezultata (titule i rejting)

Ispit se sastoji samo iz usmenog dijela.

#### Član 21.

Seminar za sticanje zvanja kantonalnog sudije organizuje se sa najmanje 30 nastavnih časova, pored navednog u članu 20. obavezno obuhvata:

- Međunarodni sistem vrednovanja rezultata;
- Istorija šaha u BiH;
- Mjesto i uloga šaha u BiH

Ispit se sastoji iz pismenog i usmenog dijela. Obadvije ocjene moraju biti pozitivne. Konačna ocjena se utvrđuje kao srednja vrijednost ocjena oba dijela ispita.

#### Član 22.

Seminar za sticanje zvanja državnog sudije organizuje se sa najmanje 35 nastavnih časova i pored navednog u članovima 20. i 21. obavezno obuhvata i Pravilnike FIDE.

Ispit se sastoji iz pismenog i usmenog dijela. Obadvije ocjene moraju biti pozitivne. Konačna ocjena se utvrđuje kao srednja vrijednost ocjena oba dijela ispita.

### **PRAVA I DUŽNOSTI SUDIJE**

#### Član 23.

Šahovske sudije vode sva zvanična takmičenja po odredbama predviđenim Pravilnicima FIDE, ŠSFBiH i nadležnih sudijskih organizacija.

#### Član 24.

Međunarodna takmičenja sude međunarodne sudije FIDE a zamjenici mogu biti sudije za dva zvanja niže. Kantonalna takmičenja sude kantonalne sudije i sudije višeg zvanja, a zamjenici mogu da budu sudije nižeg zvanja.

#### Član 25.

Sudija neposredno rukovodi takmičenjima i najodgovornija je ličnost za pravilan tok takmičenja. Njegove dužnosti proističu iz odredbi Pravila šahovske igre FIDE, ovog Pravilnika, odnosno Turnirskog pravilnika i drugih odredbi šahovske organizacije.

#### Član 26.

Dužnosti sudije su naročito sljedeće:

- Provjerava pogodnosti prostora za igru (prostranstvo, osvjetljenje, zagrijavanje, ventilacija, itd.);
- Brine se da organizator obezbijedi potreban inventar za uspješno organizovanje takmičenja (stolove, stolice, šahovske garniture, šahovske satove, formulare, zapisnike, koverta, svijeće i slično);
- Nastoji da se obezbijedi potreban tehnički materijal (demonstracione talbe, zidne tabele, obavještenja publici i slično);
- Donosi odluke o svim sporovima u toku takmičenja u svojoj nadležnosti;
- Vodi potrebnu evidenciju i dokumentaciju u toku takmičenja;
- Dostavlja organizatoru, po završenom takmičenju i u predviđenom roku izvještaj i dokumentaciju takmičenja

#### Član 27.

U dokumentaciju takmičenja se ubraja sljedeće: Pravilnik takmičenja, tabela takmičenja, zapisnici po pojedinim kolima, odnosno mečevima, formulari partija, žalbe učesnika, saopštenja i odluke sudija, odluke Turnirskog odbora i slično).

Izvještaj sudije treba da sadrži:

- Opšte odredbe i podatke o takmičenjima;
- Organizacione primjedbe;
- Karakteristike takmičenja sa osvrtom na igru pobjednika;
- Ocjena rada svog zamjenika i pomoćnih sudija;
- Pitanje discipline učesnika;
- Ispunjenje pojedinih normi za osvajanje i potvrđivanje titula